

TEZĂUR LITURGIC
25 IANUARIE

ACATISTUL
SF. IERARH
MOISE,
ARHIEPISCOPUL
NOVGORODULUI



MOSCOVA, 2000



Акафист
святителю Моисею,
архиепископу Новоградскому,
чудотворцу

Кондак 1

Избранный чудотворче, скорый заступниче и молитвенниче о душах наших, святителю Христов Моисее, яко имеяй дерзновение ко Господу, от всяких нас бед свободи, да зовем ти:

Радуйся, святителю Моисее, похвало Церкви Христовы и великий чудотворче.

Икос 1

Ангела тя земнаго и человека небеснаго прославляем вси: от земных бо к небесным восходя чистыми помыслы, достоин явился еси служитель велений Божиих. И ныне, предстоя Престолу Святыя Троицы, не престай моляся о вопиющих ти:

Радуйся, богозарный свете, освещающий нас.

Радуйся, благочестия наставниче.

Радуйся, от юности возлюбивый Бога всем сердцем твоим.

Радуйся, яко Ему единому работати возжелел еси.

Радуйся, вся красная мира сего ни во что же вменивый.

Радуйся, яко заповедем Христовым от юности последовал еси.

Радуйся, цвете благоуханный.

Радуйся, розго вертограда Христова.

Радуйся, свято и богоугодно на земли поживый.

Радуйся, яко подвигом добрым zde подвизался еси.

Радуйся, граду нашему добрый пастырю.

Радуйся, провозвестниче людем спасения.

Радуйся, святителю Моисее, похвало Церкви Христовы и великий чудотворче.

Кондак 2

Видим тя, святителю Моисее, яко звезду мысленно возсиявшую на тверди Церковней, и

всех направляющую к высоте благочестия,
поющих Богу: Аллилуиа.

Икос 2

Разум боголюбивый стяжав, о мирстей
красоте и плоти мудрованиих небрегл еси: сего
ради оставив отечество твое, Великий Новград,
и во граде Тфери иноческий образ восприимь,
ангельскому житию непорочно поревновал еси и
даров благодати Духа Святаго исполнился еси.
Темже радостию взываем ти:

Радуйся, премудрости Божия сокровище.

Радуйся, воздержанием умертвивый плотския
страсти.

Радуйся, яко благими нравы от юности
прилепился еси Христу.

Радуйся, глаголов и законов Божиих
исполнителю.

Радуйся, яко в пощениях и бдениих и
молитвах житие твое провождал еси.

Радуйся, мирская треволнения, яко
леностный сон, отрясый.

Радуйся, яко добродетелей ради твоих освяти
тя Христос.

Радуйся, твердый адаманте, сокрушаяй гордыню врагов спасения нашего.

Радуйся, яко ведущими к небеси божественными стезями бодренно шествовал еси.

Радуйся, яко от зле ведущих путей до конца уклонился еси.

Радуйся, монашескаго послушания светлый облаче.

Радуйся, ангельски во плоти поживый.

Радуйся, святителю Моисее, похвало Церкви Христовы и великий чудотворче.

Кондак 3

Силою Вышняго утверждаяся, блаженне отче, во святем жительствовании, яко чадо послушания пребывал еси во обители преподобнаго Макария Колмовскаго и день и ночь поучался еси в законе Господни, воззывая всех пети Богу: Аллилуиа.

Икос 3

Имея любовь божественную и высотою смирения украшаемь, был еси яко звезда путеводная многим и начальник священнаго

собора иноков, наказуя и уча, и вся приводя к воли Божией. Темже, яко делателю добру в вертограде Господни, приносим ти хваления:

Радуйся, светильниче божественный и светоносный.

Радуйся, еже по образу Божию соблюдый невредимо.

Радуйся, монашествующих доброто.

Радуйся, правило добродетели известнейшее.

Радуйся, яко возложив руку на рало не возвратился вспять.

Радуйся, яко управлен был еси в Царствие Христа Бога.

Радуйся, соборов иноческих похваление.

Радуйся, яко вражия ополчения упразднил еси.

Радуйся, текущих к небеси учителю.

Радуйся, ревности безплотных подражателю.

Радуйся, божественных словес хранителю.

Радуйся, преподобных и праведных сонаследниче.

Радуйся, святителю Моисее, похвало Церкви Христовы и великий чудотворче.

Кондак 4

Бури страстей многоболезненных смущают ны и озлобляют: но, исцелений источниче неоскудеваемый, утиши страсти многовременныя притекающих с верою к раце мощей твоих, и воздвигни пети Богу: Аллилуиа.

Икос 4

Слышаше ближнии и дальнии богоугодное житие твое, и егда на архипастырский престол Церкви Новграда Великаго искаху мужа достойна, абие вси желанием возжелеша имети тя пастыреначальника и святителя. Сего ради и жезл пастырства приял еси от Всероссийскаго митрополита Петра и паству твою добре упасл еси. Мы же, овцы пажити твоея, светом твоего богоразумия озаряеми, вопием ти:

Радуйся, архиерею, премудрый учителю.

Радуйся, мужу желаний, пасти стадо Христово призванный.

Радуйся, чистотою яко солнце возсиявый.

Радуйся, отче предивный.

Радуйся, пастырю прелюбезный.

Радуйся, избранный сосуде благодати божественныя.

Радуйся, апостолов сопричастниче.

Радуйся, великих святителей Новгородских преемниче и сопрестольниче.

Радуйся, бодрый страже словесных овец.

Радуйся, иерархов украшение.

Радуйся, благочестивых велений сказателю и насадителю.

Радуйся, яко славу Церкви обогатил еси ученьми твоими, богомудре.

Радуйся, святителю Моисее, похвало Церкви Христовы и великий чудотворче.

Кондак 5

Боготечная воистинну звезда был еси в житии твоем всем ищущым спасения, и по честнем успении ко спасению ны руководиши. Темже прославляющему тя Господу вопием: Аллилуиа.

Икос 5

Видеша ты людие пастыря воистинну добра,
неленостнаго строителя и бодреннаго рачителя о
спасении их: церкви бо и монастыри созидал
еси, ихже иконами украсил и книгами удоволил,
вся восполняя мздою твоею. Сего ради
похвалами ты венчаем сие:

Радуйся, отче преславный.

Радуйся, православных утверждение.

Радуйся, храмов Божиих созидателю.

Радуйся, обителей иноческих устройтелю.

Радуйся, яко видение деяний божественных
верным предал еси.

Радуйся, яко заблуждающих богомудренно
вразумляеши.

Радуйся, Православия предание со
дерзновением проповедавый.

Радуйся, благодатию Божиею
преукрашенный.

Радуйся, Церкви красото.

Радуйся, яко вся ученьми твоими
просвещаеши.

Радуйся, непостыдный о нас предстателю.

Радуйся, молитвенниче о душах наших.

Радуйся, святителю Моисее, похвало Церкви Христовы и великий чудотворче.

Кондак 6

Проповедник и образ добраго жития был еси в кротости и премудрости: и Господь видя смирения твоего высоту, свыше строения тебе слово дарует, имже лжемудрия потоки заградил еси, верныя же научил еси пети Богу: Аллилуиа.

Икос 6

Возсиял еси, яко звезда лучезарная, блистанием учений и деяний твоих, егда по осьмнадцати летех вольнаго твоего удаления со святительскаго престола паки, аще и противу твоея воли, призваху тя людие на пастырство, и прияв благословение от Патриарха Цареградскаго и митрополита Всероссийскаго, столп и утверждение Церкви показался еси. И ныне не презри притекающих к тебе и вопиющих:

Радуйся, истины поборниче.

Радуйся, ересей посрамителю.

Радуйся, светило благочестия.

Радуйся, соблазнов прогонителю.

Радуйся, яко леств беззаконных обличил еси.

Радуйся, яко чуждая учения от Церкви верных отгнал еси.

Радуйся, бодренный в вертограде Христове делателю.

Радуйся, яко вражия ополчения низложивый.

Радуйся, веры православныя таинниче.

Радуйся, яко тобою воистинну право ходити познахом.

Радуйся, яко страх Божий, начало премудрости, в сердца пасомых внушал еси.

Радуйся, яко одождением словес твоих неплодное сердце воздвигал еси.

Радуйся, святителю Моисее, похвало Церкви Христовы и великий чудотворче.

Кондак 7

Хотением от мирских сластей отлучаяся, крепко ополчался еси на невидимыя враги, святителю преподобне, и верным был еси целомудрия образ, и учений сокровище

неоскудеваемое, вопиющим о тебе Богу:
Аллилуиа.

Икос 7

Новаго тя о спасении людей ревнителя Моисеа познаваем. Якоже бо той скоро к людям беззаконнующим сниде, от горы Божия, во еже пресеци нечестивое их устремление: тако и ты к мятущимся гражданином от обители Архистратига Михаила абие притекл еси со словом вразумления, да не радуют поганья, да не пустошат град и церкви Божии. Сего ради и крепость подаде ти Бог, и не попусти людей Своих быти в посмех диаволу. И мы славяще о сем Бога, приносим ти хвалебное пение:

Радуйся, славы Божия присный ревнителю.

Радуйся, мятежей укротителю.

Радуйся, немудрых наказателю.

Радуйся, заблуждших к истине воззываяй.

Радуйся, яко тмою страстей омрачаемыя просвещаеши.

Радуйся, яко всех к небеси направляеши.

Радуйся, от работы вражия, якоже оный Моисей от Египта, изводяй.

Радуйся, во мраце прелести сидящия к свету
благоразумия возставляяй.

Радуйся, яко разжжения сатанинская
угасивый.

Радуйся, яко христиан соборы в единомыслие
приводиши.

Радуйся, яко тобою диавол попрася.

Радуйся, яко тобою Христос прославися.

Радуйся, святителю Моисее, похвало Церкви
Христовы и великий чудотворче.

Кондак 8

Странническое на земли житие пожив и
волнений множество благоискусно прешед, к
безскорбному животу достигл еси и дерзновение
имаши к Подвигоположнику Богу, Емуже
вопием: Аллилуиа.

Икос 8

Весь исполнен любви Христовы и Благаго
Бога подражатель быв, пастырски порученное
тебе от Христа стадо упасл еси: лица бо сильных
не стыдяся наставляял их на путь спасения,
немощныя заступал еси, вдовам и сиротам быв
помощник и любовь нелицемерную ко всем

стяжав. Сего ради, чтуще святую память твою, любовью ти вопием:

Радуйся, свидений Господних непостыдный проповедниче.

Радуйся, яко кроткими глаголы и многим разумом противныя вразумляя еси.

Радуйся, гордыни смирителю, убогих же заступниче.

Радуйся, яко стяжал еси любовь, николиже отпадающую.

Радуйся, милосердия источниче.

Радуйся, непрестанное о людех промышление.

Радуйся, нищих питателю.

Радуйся, алчущым хлебе неоскудеваемый.

Радуйся, всех надежное прибежище.

Радуйся, ненадежных надеждо светлая.

Радуйся, болящих услышание скорое.

Радуйся, скорбных отрадо.

Радуйся, святителю Моисее, похвало Церкви Христовы и великий чудотворче.

Кондак 9

Всего себе вперив к божественному желанию и плоть повинув духу воздержанием всяким и добродееянием, пожил еси в чистой совести и вере неразоримей. Сего ради и в селениях райских водворяешься поя Богу: Аллилуиа.

Икос 9

Ветий многовещанных красноглаголаня не возмогут исповести славы твоея, ни изрещи величия добродетелей твоих: от юности бо взем крест твой, достигл еси идеже доброта неизреченна и недомысленна, и на небесех живещи, во свете невечернем. Молися убо о нас, приносящих ти хвалебныя пения:

Радуйся, тщету мирских попечений отринувый.

Радуйся, в преподобии и правде Богу послуживый.

Радуйся, яко о земных небрегий, небесная наследовал еси.

Радуйся, яко пресветло житие твое на земли прешел еси.

Радуйся, яко верою возвращаемъ древо животное явился еси.

Радуйся, струе приснотекущая, напаяющая верных.

Радуйся, Иерусалима Небеснаго гражданине.

Радуйся, страны нашея светлое радование.

Радуйся, блаженство вечное унаследовавый.

Радуйся, некрадомое богатство обретый.

Радуйся, прибежище наше и упование.

Радуйся, скорое в болезнях врачевание.

Радуйся, святителю Моисее, похвало Церкви Христовы и великий чудотворче.

Кондак 10

Спаستися хотяй всем человеком и в разум истины приити, дарова нам тебе, яко сокровище неотъемлемо, яко сад красный добродетелей, яко светильника божественнаго и светлоснаго: исцелений бо благодать источаеши всем, притекающим к раце мощей твоих, и воздвизаеши верныя воспевати Богу: Аллилуиа.

Икос 10

Стену прибежища стяжахом тя, досточудне Моисее, и в скорбех заступление: предваряеши бо в бедах сущья, якоже иногда куплю деющаго от потопления спасл еси, и разбойничю умышление на того паки раззорил еси. Не отрини убо и нас, умиленно ти взывающих:

Радуйся, в бедах сущым предстателю.

Радуйся, нападствуемым свободителю.

Радуйся, плавающих хранителю.

Радуйся, путешествующым благое поспешение.

Радуйся, спасаая от смерти горькия.

Радуйся, в нечаянии сущым скорое поможение.

Радуйся, яко речная волнения уставляеши.

Радуйся, яко обстояния лукавства и наветы злобы разрушаеши.

Радуйся, обидимых покрове.

Радуйся, немоществующих крепосте.

Радуйся, яко впадающих во искушения возставляеши.

Радуйся, яко от скорбей и озлоблений
исхищаеши.

Радуйся, святителю Моисее, похвало Церкви
Христовы и великий чудотворче.

Кондак 11

Пение наше молебное не презри, незлобиве
отче: се бо верою и любовью подвигаеми,
притекаем ко честному гробу твоему, и
прославляюще Венчавшаго тя Господа, молимся
ти: молися выну у Престола Славы избавитися
нам от враг видимых и невидимых, да во
благодарениих зовем Дивному во святых Своих
Богу: Аллилуиа.

Икос 11

Светодательная свеща явился еси граду
нашему, блаженне отче, в нетлении святого
телесе твоего. Темже блажим тя, яко и в граде
вышнем вселяешия и посреде нас
милосердуеши, приражения лести демонския
сокрушая и отгоняя от почитающих священную
память твою:

Радуйся, человеце Божий.

Радуйся, яко прославленный тобою Господь
прослави тя.

Радуйся, яко в преподобии пожил еси.

Радуйся, яко не даде Господь видети тебе, преподобному своему, истления.

Радуйся, яко в вышних селениих торжествуеши.

Радуйся, яко и нас, в дольном мире пребывающих, не оставляеши.

Радуйся, небожителю богопросвещенный.

Радуйся, грешных ко исправлению приводяй.

Радуйся, пастырю благий.

Радуйся, волков мысленных отгнание.

Радуйся, яко с ангелы ликовствуеши.

Радуйся, яко предстоиши Престолу Славы невечерняя.

Радуйся, святителю Моисее, похвало Церкви Христовы и великий чудотворче.

Кондак 12

Благодатию Духа Святаго, еюже просвещен быв при жизни, и по смерти наслаждаешися, облагодати наша мысли и сердца: да чистыми усты и непорочными помыслы благодарим

Благодееущаго нам Господа и воспеваем Ему:
Аллилуиа.

Икос 12

Поюще твое христоподражательное на земли
житие, богомудрая деяния и по блаженней
кончине преславная чудодействия, молим тя
присно заступати ны от враг видимых и
невидимых, якоже иногда от умышления злых
человек, еже расхитити святую обитель, идеже
положено честное тело твое, спасл еси оную
дивным явлением твоим. Темже, яко выну
благая людем твоим ходатайствующему у
Престола Божия, взываем ти:

Радуйся, присный о нас к Богу ходатаю.

Радуйся, обидимых ограждение.

Радуйся, злобы сокрушителю.

Радуйся, наветов вражиих разорение.

Радуйся, обидящих карателю.

Радуйся, яко неправых ковы разрушаеши.

Радуйся, яко стяжал еси к Богу дерзновение.

Радуйся, яко и на земли прославляешия.

Радуйся, обители твоя крепосте и
украшение.

Радуйся, всех нас защищение.

Радуйся, честными мощами твоими
благодати исцеления подаваяй.

Радуйся, всех усердно к тебе прибегающих
пристанище необуреваемое.

Радуйся, святителю Моисее, похвало Церкви
Христовы и великий чудотворче.

Кондак 13

О священнейший отче, пастырю и учителю
наш Моисее, не отрини сие наше усердное
приносимое ти пение! Избави нас твоим
ходатайством и помощью от всякаго зла и
вечныя муки, да с тобою воспеваем Богу:
Аллилуиа.

*Этот Кондак читается трижды, затем
Икос 1-й и Кондак*

Молитва

О священнейший отче, святителю Христов
Моисее, пастырю и учителю наш, не отрини нас,
с верою притекающих к раце мощей твоих и к
твоему заступлению, и теплою молитвою ты
призывающих: но скоро потщися помолитися
Царю царствующих и Господу господствующих,

да избавить стадо Свое от волков, губящих е, и всяку страну христианскую огради и сохрани святыми твоими молитвами от мирскаго мятежа и труса, нашествия иноплеменник и междоусобных брани, от глада и губительства, потопа, и меча, и напрасныя смерти: и якоже помиловал еси грядущаго куплю деяти от потопления и от разбойников спасл еси святую обитель сию твою, тако помилуй и нас, умом, словом и делом во тьме греховней сущих, и избави нас гнева Божия и вечныя казни, яко да твоим ходатайством и помощию, Своим же милосердием и благодатию, Христос Бог тихое и безгрешное житие даст нам пожити в веце сем и избавить нас шуияго стояния, сподобит же деснаго со всеми святыми. Аминь.



**ПОЛНЫЙ
АКАФИСТНИК
КАНОНИЧЕСКИЙ**

**АКАФИСТЫ
КО ГОСПОДУ БОГУ
ПРЕСВЯТОЙ
БОГОРОДИЦЕ
АРХАНГЕЛАМ
И АНГЕЛАМ**

І

**НОВОЕ
НЕБО**